

## Communicaziun a las medias

### Impuls litterars «live» da Lumbrin

Cuir, ils 22-08-2018 – **Tschaffen da tadar? *Impuls* prelegids là, nua che l'emissiun *Impuls* da Radiotelevision Svizra Rumantscha (RTR) vegn uschiglio taldada. Quell'ocasiun sa porscha dumengia, ils 26 d'avust 2018 a las 16:30, sin il bain puril «La Muota» da la famiglia Casanova a Lumbrin. A chaschun da la tschintgavla lectura da la turnea litterara «Sin il viv!» prelegian Carin Caduff, Asa S. Hendry, Myriam Pelican ed Arnold Rauch live lur *Impuls*.**

Mintga damaun, cura ch'el mulscha las vatgas taidla Alexander Casanova l'*Impuls* da RTR. Cura che l'*Impuls* vegn al radio, sa il pur ch'el ha anc ventg minutas peda avant da stuir manar il latg en la latgaria. Insumma, sco era tar blers auters, fa l'*Impuls* part da ses mintgadi. Per engraziar al public per ses grond interess a l'emissiun envida RTR en collavuraziun cun la Lia Rumantscha da vegnir a tadar *Impuls* prelegids live.

Il pli vegl autor da «Sin il viv!» a Lumbrin è Arnold Rauch ch'è oriund da Ftan. El è cineast e schurnalist e viva a Cuir. Sper la chanzun «Il mariner» ha Arnold Rauch era scrit texts litterars da differents geners ch'èn tranter auter vegnids publitgads en la «Litteratura» da l'Uniun per la Litteratura Rumantscha. La pli giuvna scriptura che prelegia a Lumbrin è Asa S. Hendry da Vella. Ella ha fatg la matura quest onn, fa teater, va ad alp e scriva. Il 2015 è cumparà ses emprim roman da fantasia «Emalio» tar la Chasa Editura Rumantscha ch'ella ha scrit ensemen cun Flurina Albin. Dapi lura scriva Asa S. Hendry suletta - quai cun grond success.

Er Lumneziana è l'autura Carin Caduff che lavura sco pedagoga sociala en il chantun Argovia. Carin Caduff scriva lirica e prosa. Ses texts èn vegnids publitgads tranter auter en la «Litteratura 35» cumparida il 2016 tar l'Uniun per la Litteratura Rumantscha. La quarta autura è Myriam Pelican-Camenisch che scriva *Impuls* dapi l'onn 2011. Ella ha frequentà il seminari scolastic a Cuir e suenter lavurà sco redactura tar il Radio Rumantsch. Uss è ella scolasta, pura e mamma e cura ch'i va, scriva ella per exempel prosa curta spiertusa en il pli bel dialect da Domat per l'emissiun *Impuls*.

La sisavla lectura da «Sin il viv!» suonda dumengia, ils 7 d'october 2018, a las 16:00 en la stiva da la Chesa Gianzun a Schlarigna. Là legian Dumenic Andry, Sara Francesca Hermann, Bettina Secchi e Martin Cantieni *Impuls* che raquintan da princessas da pantoflas ed eroxs dal jet-set. La turnea è publica, l'entrada libra.

#### Dapli infurmaziuns

RTR | Tamara Deflorin | scheffa communicaziun | tel. 081 255 75 09 | tamara.deflorin@rtr.ch